

# Kanikau

## *KE KANIKAU*

- 1 NANI ka noho mehameha ana o ke kulanakauhale i piha i kanaka! Ua like hoi me ka wahine kanemake! He nui oia iwaena o na lahuikauaka, He alii wahine iwaena o na aina; Ua auhauia nae i ka hana!
- 2 Uwe nui oia i ka po, Aia no kona waimaka ma kona mau papalina: Aohe mea nana ia e hoomaha aku iwaena o ka poe a pau i aloha aku ia ia. Ua hana aku kona poe makamaka a pau ia ia ma ka wahahhee, Ua lilo lakou i poe enemi nona.
- 3 Ua lawepioia o ka Iuda, no ka popilikia, a no ka hookauwa nui ia: Ke noho nei ia iwaena o ko na aina e, Aole i loaa ia ia ka hoomaha; Loaa no ia iloko o ka pilikia i ka poe a pau i hahai ia ia.
- 4 Kumakena no na alanui o Ziona, No ka hele ole mai o lakou i ka ahaaina: Ua mehameha kona mau pukapa a pau; Ke kaniuhu nei kona mau kahuna pule, Ua hoopilikiaia kona mau wahine puupaa, A ua kaumaha loa no ia.
- 5 Ua lilo kona poe enemi i poo, Ua maluhia hoi ka poe i huhu ia ia; No ka mea, ua hookaumaha mai o Iehova ia ia no ka nui o kona hewa; Ua hele pio aku la kana poe keiki imua o ke alo o ka enemi.
- 6 Ua hele aku la ka nani a pau o ke kaikamahine o Ziona; Ua like hoi kona mau alii me na

dia loaa ole ka ai, Ua hele hoi lakou me ka ikaika ole imua o ka mea nana e hahai.

<sup>7</sup> I na la o kona kaumaha, a me kona hoinoia, Hoomanao iho la o Ierusalema i kona mau mea a pau i makemakeia, Na mea i loaa ia ia i na la mamua, I ka wa i haule ai kona poe kanaka iloko o ka lima o ka enemi, Aohe hoi mea i kokua ia ia. Ike aku la na enemi ia ia, a hoowahawaha iho la i kona mau Sabati.

<sup>8</sup> Ua hana hewa nui loa aku o Ierusalema; Nolaila oia i kuewa wale aku ai; O ka poe a pau i hoomaikai ia ia, Ke hoowahawaha nei lakou ia ia, No ka mea, ua ike lakou i kona wahi hilahila; Oia, ke kaniuhu nei oia, a huli ihope.

<sup>9</sup> Aia no kona haumia ma kona hualole, Aole ia i hoomanao i kona hope loa; Nolaila haule kupanaha iho la oia; Aohe mea nana e hoomaha ia ia. E Iehova, e nana mai oe i ko'u pilikia; No ka mea, ua hookiekie ka enemi.

<sup>10</sup> Ua hohola aku ka enemi i kona lima maluna o kona mau mea a pau i makemakeia; No ka mea, ua ike aku oia i ko na aina e, e komo ana iloko o kona wahi hoano, Ka poe au i kauoha'i, aole lakou e komo iloko o ke anaina kanaka iou la.

<sup>11</sup> Ua kaniuhu no kona poe kanaka a pau, Ke imi nei lakou i ka ai; Ua haawi lakou i ko lakou mau mea, i mea ai, e hoihoi mai ai i ke ola; E nana mai oe, e Iehova, a e manao mai; No ka mea, ua lilo au i mea ino.

<sup>12</sup> He mea ole ia ia oukou a pau, e hele ae nei ma ke ala? E nana mai nae, a e ike, Ina

e like kekahī ehaeha me ko'u ehaeha, Ka  
mea i kauia maluna o'u, Ka mea a Iehova  
i hookaumaha mai ai ia'u, I ka la o kona  
inaina nui.

<sup>13</sup> Mailuna mai oia i hoouna mai ai i ke ahi iloko o  
ko'u mau iwi, A iho mai la ia iloko olaila. Ua  
uhola mai oia i upena no ko'u mau wawae,  
Ua hoihoi hope mai oia ia'u. Ua haawi mai  
oia i ka mehameha a me ka maule ia'u a pau  
ka la.

<sup>14</sup> Ua hoopaaia e kona lima ka auamo o ko'u mau  
hewa; Ua ulanaia, a ua kauia maluna o ko'u  
a i; Ua hoonawaliwali mai oia i ko'u ikaika,  
Ua haawi mai ka Haku ia'u iloko o na lima,  
Hiki ole ia'u ke ku iluna.

<sup>15</sup> Ua hoowahawaha mai ka Haku i ko'u poe koikoi  
a pau iloko o'u, Ua kahea mai oia i ka  
ahakanaka e ku e mai ia'u, E luku i ko'u poe  
kanaka ui: Ua hahi ka Haku i ka luawaina o  
ke kaikamahine puupaa o ka Iuda.

<sup>16</sup> O keia mau mea ka'u e uwe nei, O kuu maka,  
ke kahe nei kuu maka i ka wai, No ka mea,  
ua loihi mai o'u aku nei ka mea hoomaha,  
nana e hoomaha mai i ko'u uhane: Ua  
mehameha ka'u poe keiki, no ka mea, ua  
lanakila ka enemi.

<sup>17</sup> Hohola ae la o Ziona i kona mau lima, Aohe  
mea nana ia e hoomaha mai. Ua kauoha  
mai o Iehova no Iakoba, E kaapuni kona  
poe enemi ia ia: Ua lilo o Ierusalema i mea  
haumia iwaena o lakou.

<sup>18</sup> O Iehova, ua hemolele oia; No ka mea, ua ku  
e aku au i kona waha; Ke noi aku nei au,  
e hoolohe mai, e na kanaka a pau, E nana

mai hoi i ko'u eha; Ua hele aku la ko'u poe wahine puupaa, a me ko'u poe kanaka ui iloko o ke pio.

<sup>19</sup> Kahea aku la au i ka poe i aloha mai ia'u, Wahahée mai lakou ia'u. Kaili aku la ke ea o ka'u mau kahuna, a me ka'u poe lunakahiko, ma ke kulanakauhale, I ka wa e imi ana lakou i ka ai na lakou, I mea e hoihoi mai ai i ko lakou ola.

<sup>20</sup> E nana mai oe, e Iehova, no ka mea, ua pilikia au; Ua hu aku ko'u opu, ua kahuli hoi ko'u naau iloko o'u, No ka mea, ua kipi nui loa aku au. Ma kahi e aku, na ka pahikaua i hoopau i na keiki, A ma ko makou wahi, he make.

<sup>21</sup> Ua lohe lakou i ko'u kaniuhu ana. Aohe mea nana e hoomaha mai ia'u; Ua lohe no ko'u poe enemi a pau i ko'u popilikia, Ua olioli lakou no kau hana ana pela: E hoopuka mai no oe i ka la au i hai mai ai, E like auanei lakou me au.

<sup>22</sup> E hoopukaia ko lakou hewa a pau imua ou; A e hana aku oe ia lakou, Me kau i hana mai ai ia'u, no ko'u mau hewa a pau; No ka mea, ua nui ko'u kaniuhu ana, ua maule hoi ko'u naau.

## 2

<sup>1</sup> NANI ka uhi pouli ana o ka Haku i ke kaikamahine o Ziona i kona huhu! Ua kiola mai oia i ka nani o ka Israela, mai ka lani a i ka honua, Aole manao i kona keehana wawae i ka la o kona inaina!

- 2** Ua moni aloha ole ka Haku i na wahi noho a pau o ka Iakoba, I ka hanini ana o kona huhu: Ua hoohiolo oia i na pakaua o ke kaikamahine o Iuda, Ua hoohaahaa oia ia ia ilalo i ka lepo; Ua hoohaumia oia i ke aupuni, a me kona mau alii.
- 3** I ka wela ana o kona ukiuki, Ua okioki ae oia i na pepeiaohao a pau o ka Israela. Ua hoihoi hope oia i kona lima akau mai ke alo aku o ka enemi; Ua hoopau oia ia Iakoba, e like me ke ahi lapalapa i ai i na wahi a puni.
- 4** Ua hoolena oia i kona kakaka e like me ka enemi; Ua kupaa oia me kona lima akau e like me ka mea ku e, A ua luku mai oia i na mea a pau i makemakeia e ka maka; Maluna o ka halelewa o ke kaikamahine o Ziona, Ua ninini aku la oia i kona inaina e like me ke ahi.
- 5** Ua like ka Haku me ka enemi; Ua moni oia i ka Israela, Ua moni oia i kona mau halealii a pau, Ua hoopau hoi i kona mau pakaua, Ua hoonui oia i ke kumakena, a me ke kaniuhu ana maloko o ke kaikamahine o Iuda,
- 6** Ua wawahihino oia i kona pa, e like me ko ke kihapai; Ua hoopau oia i kona mau la ahaaina. Ua hoolilo o Iehova i na ahabalawai, a me na Sabati, i mea hoopoina wale ia ma Ziona; I ka wewela ana o kona huhu, ua hoowahawa oia i ke alii, a me ke kahuna.
- 7** Ua hoopailua ka Haku i kona kuahu, Ua hoowahawa oia i kona wahi laa, Ua haawi oia iloko o ka lima o ka enemi i na pa o kona mau halealii, Ua walaau lakou iloko o ka hale o Iehova, e like me ka la ahaaina.

- 8** Ua manao o Iehova e wawah i ka pa o ke kaikamahine o Ziona; Ua hoomoe oia i ke kaula-aua, Aole ia i hoihoi mai i kona lima, mai ka luku ana; Hookanikau oia i ka pakaua, a me ka pahale, Kanikau pu no lakou.
- 9** Ua poho kona mau pukapa iloko o ka lepo, Ua wawah i oia, a ua uhai i kona mau kaola; Aia no kona mau alii, a me kona mau haku iwaena o ko na aina e; Aohe kanawai; Aole i loaa i kona mau kaula ka hoike ana mai o Iehova mai.
- 10** Ke noho nei no na lunakahiko o ke kaikamahine o Ziona ma ka honua, me ka ekemu ole; Ua hoolei i ka lepo maluna o ko lakou mau poo, Ua kaei lakou ia lakou iho me ke kapa ino; Kulou no na poo o na wahine puupaa o Ierusalema ilalo i ka honua.
- 11** No ko'u uwe ana, ua pau ko'u mau maka, Ua hu ko'u naau iwaho, Ua hanini ko'u ake iwaho ma ka lepo, No ka make ana o ke kaikamahine o ko'u poe kanaka; No ka mea, ua maule na keiki a me na mea ai waiu ma na alanui o ke kulanakauhale.
- 12** Ke olelo nei lakou i ko lakou poe makuwahine, Auhea ka berena, a me ka waina? No ka mea, ua maule lakou e like me ka poe i houia ma na alanui o ke kulanakauhale, Ua kaili aku hoi ko lakou ea ma ka poli o ko lakou poe makuwahine.
- 13** Heaha ka mea a'u e lawe ai i mea hoike na'u? Heaha ka mea a'u e hoohalike ai ia oe, e ke kaikamahine o Ierusalema? Heaha ka mea a'u e kau like ai me oe, I hoomaha aku ai au ia oe, e ke kaikamahine puupaa o Ziona? No

ka mea, ua laula kou wawahiiia, e like me ke kai; Owai ka mea hoola aku ia oe?

- 14** Ua ike kou mau kaula i na mea hewa, a me na mea lapuwale nou; Aole nae lakou i wehe i ka pale o kou hewa, I mea e hoihoi ai i kou pio ana; Aka, ua ike lakou i na wanana wahahee nou, a me na hoowalewale.
- 15** O ka poe a pau e hele ae nei ma ke alo, paipai no lakou i ko lakou lima ia oe; E hoowahawaha no lakou, A e hookunokunou i ko lakou mau poo, i ke kaikamahine o Ierusalema, O keia anei ke kulanakauhale a lakou i kapa'i Ka mea nani loa, Ka mea e hauoli ai ko ka honua a pau?
- 16** Ua oaka ae Ia kou poe enemi a pau i ko lakou waha ia oe, Hoowahawaha lakou, a kui na niho; I mai la lakou, Ua moni kakou ia ia; Oiaio, eia ka la a kakou i makemake ai, Ua loaa ia kakou, ua ike kakou.
- 17** Ua hana o Iehova i ka mea ana i manao ai, Ua hooko oia i kana olelo ana i kauoha mai ai i na la mamua; Ua hoohiolo oia, aole i aloha mai; Ua hoohauoli oia i ka enemi maluna ou, Ua hookiekie oia i ka pepeiaohao o kou poe enemi.
- 18** Kahea aku la ko lakou naau i ka Haku, E ka papohaku o ke kaikamahine o Ziona, E hookahe i na waimaka me he muliwai la i ke ao me ka po; Mai hoomaha ia oe iho, Mai hoomaha ka onohi o kou maka.
- 19** E ku mai iluna, e uwe aku i ka po; I ka makamua o na wati i ka po, E ninini aku i kou naau me he wai la, imua o ka maka o ka Haku. E hapai i kou mau lima io na la, no ke oia o na

keiki opioipo ou, Ka poe i maule no ka pololi  
ma ke poo o na alanui a pau.

- <sup>20</sup> E nana mai, e Ienhova, A e hoomanao i ka mea  
au i hana ino aku ai i keia. E ai anei na  
wahine i ka lakou hua iho? I na keiki hoi  
e hiipoia'na? E pepehiia anei ke kahuna, a  
me ke kaula, ma kahi hoano o ka Haku?
- <sup>21</sup> Ua moe no ka opioipo, a me ka elemakule ma  
ka lepo ma na alanui; Ua hina ko'u mau  
wahine puupaa, a me ko'u poe kanaka ui i  
ka pahikaua; Ua luku mai oe ia lakou i ka  
la o kou inaina, Ua pepehi mai no oe, aole i  
aloha.
- <sup>22</sup> Ua kahea aku oe i ko'u mau mea weliweli a  
puni, e like me ka la ahaaina, Aohe hoi mea  
pakele, a koe mai, i ka la o ko Iehova huhu;  
Ka poe a'u i hii ai, a malama, Ua hoopau ka  
enemi ia lakou.

### 3

- <sup>1</sup> O WAU no ke kanaka i ike i ka popilikia, Malalo o  
ka laau o kona ukinki.
- <sup>2</sup> Ua alakai oia ia'u, a ua lawe mai ia'u iloko o ka  
pouli, Aole iloko o ka malamalama.
- <sup>3</sup> He oiaio, ua huli ku e mai oia ia'u, Ua huli oia i  
kona lima e ku e ia'u a pau ka la.
- <sup>4</sup> Ua hoopau oia i ko'u io, a me ko'u ili; Ua uhai oia  
i ko'u mau iwi.
- <sup>5</sup> Ua kukulu ku e mai oia ia'u, Ua hoopuni mai ia'u  
i ka awaawa, a me ke kaumaha.
- <sup>6</sup> Ua hoonoho mai oia ia'u ma na wahi pouli, E like  
me ka poe i make i ka, wa kahiko.

- <sup>7</sup> Ua hoopuni mai oia ia'u i ka pa, i ole au e puka  
    iwaho; Ua hana oia i ko'u kaula keleawe a  
    kaumaha.
- <sup>8</sup> I ka wa a'u e kahea aku ai, a nonoi aku, Pani mai  
    la oia i ka'u pule ana.
- <sup>9</sup> Ua hoopuni mai oia ia'u me na pohaku i kalaiia;  
    Ua hookeekee oia i ko'u mau alanui.
- <sup>10</sup> Ua like oia ia'u me ka bea e hoohalua ana, Me he  
    lion a la hoi ma na wahi malu.
- <sup>11</sup> Ua kapae oia i ko'u mau aoao, ua haehae mai  
    ia'u; Ua hoolilo mai oia ia'u i mehameha.
- <sup>12</sup> Ua hoolena oia i kona kakaka, Ua kau oia ia'u me  
    he hoailona la no ka pua.
- <sup>13</sup> Ua hookomo mai oia i kona mau pua iloko o ko'u  
    opu.
- <sup>14</sup> He mea akaaka no wau i ko'u poe kanaka a pau;  
    O ko lakou mele akaaka, a pau ka la.
- <sup>15</sup> Ua hoomaona mai oia ia'u i na mea awaawa, Ua  
    hooona mai oia ia'u i ka laau awahia.
- <sup>16</sup> Ua uhai oia i ko'u mau niho i na iliili, Ua uhi mai  
    oia ia'u i ka lehu.
- <sup>17</sup> Ua kipaku mai oe i ko'u uhane mai ka maiu aku;  
    Poina hoi ia'u ka pomaikai.
- <sup>18</sup> I iho la au, Ua hookiia kuu ikaika, A me ka laua  
    ana o kuu manao, mai Iehova mai;
- <sup>19</sup> E manao ana hoi au i ko'u popilikia a me ko'u  
    eha, I ka laau awaawa, a me ka laau make.
- <sup>20</sup> Ke manao nui nei ko'u uhane ia mea, Me ke  
    kulou iho iloko o'u.
- <sup>21</sup> Ke hoihoi mai nei au i keia iloko o ko'u naau, A  
    nolaila, ua laua kuu manao.
- <sup>22</sup> No ka lokomaikai o Iehova, aole kakou i anaiia;  
    No ka pau ole hoi o kona aloha.

- 23 He hou mai no i na kakahiaka a pau; Ua nui loa  
no kou oiaio.
- 24 O Iehova no ko'u kuleana, wahi a kuu uhane,  
Nolaila e lana'i kuu manao ia ia.
- 25 Ua maikai o Iehova i ka poe kakali ia ia, I ka  
uhane hoi i imi aku ia ia.
- 26 He mea maikai ke lana ka manao, no ka hoolaia  
mai e Iehova, me ka ekemu ole hoi.
- 27 He mea maikai i ke kanaka ke lawe i ka auamo i  
kona wa opioipo.
- 28 Ke noho mehameha ia me ka ekemu ole, No ka  
mea, [na ke Akua no] i kau ia mea maluna  
ona.
- 29 Ke waiho hoi ia i kona waha ma ka lepo, Ina  
paha e loaa ia ia ka laua o ka manao.
- 30 Ke haawi no hoi oia i kona papalina i ka mea  
nana ia e hahau; Ke hoopihaiia oia i ka  
hoowahawahaia.
- 31 Aole nae e kipaku mau loa aku o ka Haku;
- 32 Ina e hookaumaha mai oia, e aloha mai no ia, E  
like me ka nui o kona lokomaikai.
- 33 Aole no kona makemake ia e hookaumaha mai  
ai, A hoeha i na keiki a kanaka.
- 34 E hahi malalo iho o kona mau wawae, I na mea  
pio a pau o ka honua,
- 35 E hoohuli ae i ka pono o ke kanaka, Mai ka maka  
ae o ka Mea kiekiae,
- 36 E hana kekee i ke kanaka i kona hookolokoloia,  
Aole i apono mai ka Haku ia mau mea.
- 37 Owai ka mea nana e olelo, a ko no, Ke kauoha  
ole mai ka Haku?
- 38 Mai ka waha mai o ka Mea kiekiae, Aole i puka  
mai ka hewa, a me ka maikai,

- 39 No ke aha la e ohumu ai ke kanaka e ola ana, O  
ke kanaka hoi no kona hoopaiia?
- 40 E huli kakou i ke ano o ko kakou mau aoao, E  
hoao hoi, a e hoi hou aku ia Iehova.
- 41 E hapai kakou i ko kakou mau naau a me na  
lima, I ke Akua iloko o ka lani.
- 42 Ua hana hewa aku makou, a na kipi, Aole no hoi  
oe i kala mai.
- 43 Ua uhi mai oia ia makou i ka huhu, a ua  
hoomaaui mai; Ua pepehi mai oe, aole i  
aloha mai.
- 44 Ua uhi no oe ia oe iho i ke ao, I komo ole aku ai  
ka pule.
- 45 Ua hoonoho oe ia makou i lepo i kahiliia. A i mea  
i hoowahawahaia iwaena o na kanaka.
- 46 Ua hamama ku e mai ia makou na waha a pau o  
ko makou poe enemi.
- 47 Eia no imua o makou, ka makau a me ka lua, O  
ka lukuia, a me ke anaiia.
- 48 Ke kahe nei na muliwai ma ko'u mau maka,  
No ke anaiia o ke kaikamahine o ko'u poe  
kanaka.
- 49 Ko kulu nei no ko'u maka, aole hooki, Aole hoi i  
hoomaha,
- 50 A nana mai o Iehova, a ike, mai ka lani mai.
- 51 Ke hoeha ko'u maka i ko'u naau, no na  
kaikamahine a pau o ko'u kulanakauhale.
- 52 Me he manu la i hahai hala ole mai ai ko'u poe  
enemi ia'u me ka ikaika.
- 53 Ua hooki lakou i ko'u ola ma ka lua, Ua hoolei  
mai i ka pohaku maluna o'u.
- 54 Kahe ae la na wai maluna o kuu poo, Alaila,  
olelo iho la au, Ua hookiia mai au.

- 55 Kahea aku la au i kou inoa, o Iehova, Mailoko ae  
o ka lua hohonu.
- 56 Ua lohe no oe i ko'u leo; Mai huna oe i kou  
pepeiao, i ko'u hanu ana, a me ko'u kahea  
ana.
- 57 Hookokoke mai no oe i ka la a'u i kahea aku ai la  
oe; I mai la hoi oe, Mai makau.
- 58 E ka Haku, ua kokua mai oe ia'u i ka hoopiiia o  
kuu uhane; Nau no i hoolapanai i ko'u ola.
- 59 E Iehova, ua ike no oe i ko'u hookaumahaia, Nau  
no e hooponopono i ko'u hihia.
- 60 Ua ike no oe i ko lakou hoomaau ana a pau, A me  
ko lakou mau manao ku e ia'u a pau.
- 61 E Iehova, ua lohe no oe i ko lakou hoowahawaha  
ana, A me ko lakou mau manao ku e ia'u a  
pau:
- 62 I na olelo a ka poe i ala ku e mai ia'u, A me ko  
lakou imi ku e ia'u a pau ka la.
- 63 E nana i ko lakou noho ana ilalo, a me ko  
lakou ku ana iluna, owau no ko lakou mele  
akaaka.
- 64 E hoihoi oe i ka hoopai ana maluna o lakou, e  
Iehova, E like hoi me ka hana ana a ko lakou  
mau lima.
- 65 E haawi oe ia lakou i ke kaumaha o ka naau, I  
kou hoino hoi, ia lakou.
- 66 Me ka huhu oe e hahai aku ai, A e luku aku ia  
lakou, mailalo aku o na lani o Iehova.

## 4

- <sup>1</sup> NANI ka mae wale ana o ke gula! A me ke ano  
e ana o ke gula maikai! Ua hooleiia na

pohaku o kahi hoano ma ke poo o na alanui  
a pau.

- <sup>2</sup> O na keiki nani o Ziona i kau pu ia me ke gula maikai, Nani ko lakou manao like ia me na ipu lepo, Ka hana a na lima o ka potera!
- <sup>3</sup> Unuhi ae no na ia nui i ka omaka waiu, A hanai waiu aku i ka lakou poe keiki: Aka, ua lokoino ke kaikamahine a ko'u poe kanaka, E like me na Iana o ka waonahele.
- <sup>4</sup> Ua pipili ke alelo o ke keiki ai waiu i ke aluna o ka waha, no ka makewai; Nonoi aku na keiki i ka berena, Aohe mea nana e haawi aku na lakou.
- <sup>5</sup> O ka poe i ai i ka ai maikai, Ua wailana lakou ma na alanui, O ka poe hoi i aahuia i ka lole ula, Ua apo iho lakou i na puu lepo.
- <sup>6</sup> Ua hooia'ku ka hewa o ke kaikamahine a ko'u poe kanaka, Mamua o ka hewa o ko Sodoma, Ka mea i hookahuliia ma ke amo aua o ka maka, Aohe lima ikaika maluna ona,
- <sup>7</sup> Oi aku ka maemae o kona poe laa, mamua o ko ka hau, Oi aku ko lakou keokeo mamua o ka waiu, Oi aku ka ula o ke kino, i ko na pohaku ula, A like ko lakou helehelena me ko ka sapeiro.
- <sup>8</sup> Ua oi aku ka eleelo o ko lakou helehelena i ko ka pouli, Aole lakou i ikeia ma na alanui; Ua pipili ko lakou ili i ko lakou mau iwi, Ua maloo, ua like hoi me ka laau.
- <sup>9</sup> Ua oi ka pomaikai o ka poe i make i ka pahikaua, mamua o ko ka poe i make i ka pololi: Hokii ae la keia poe, ua houia no ka hua ole o ka mahinaai.

- 10 O na lima o na wahine aloha, ua hoolapalapa lakou i ka lakou mau keiki iho; O lakou no ka lakou ai i ka make ana o ke kaikamahine a ko'u poe kanaka.
- 11 Ua hooko mai o Iehova i kona huhu, Ua ninini mai oia i kona inaina nui; Ua hoa oia i ke ahi maloko o Ziona, A ua ai ia i kana mau kumu.
- 12 Aole i hiki i na'lii o ka honua, a me ka poe a pau e noho la ma ke ao nei, ke manao, E komo mai ana ka enemi, a me ka mea huhu iloko o na pukapa o Ierusalema.
- 13 No ka hewa o kona mau kaula, ka hala hoi o kona mau kahuna, Ka poe i hookahe i ke koko o ka poe pono iwaenakonu ona,
- 14 Kuewa makapo aku lakou ma na alanui, Ua hoohaumia ia lakou iho i ko koko, Nolaila, aole hiki ke hoopaku i ko lakou aahu.
- 15 Kahea mai la na kanaka ia lakou, E hele aku, ua haumia; E hele aku, e hele aku, mai hoopaku; Ia lakou i holo ai, a kuewa aku, i ae la lakou iwaena o ko na aina e, Aole lakou e noho hou.
- 16 Na ka maka o Iehova i hoopuehu lakou; Aole ia e manao hou mai ia lakou; Aole lakou i manao i na maka o na kahuna, Aole i aloha i na lunakahiko.
- 17 A hiki mai i keia wa, ua maule ko makou mau maka, no ke kokua makehewa ia mai; I ko makou kakali ana, ua kakali makou i ka lahuikanaka hoola ole mai.
- 18 Hoohalua lakou i ko makou hele ana, I ole ai makou e hele ma na alanui; Ua kokoke ko makou hope, ua piha ko makou mau la, no ka mea, ua hiki mai ko makou hope.

- <sup>19</sup> Ua oi ka mama o ka poe alualu mai ia makou mamua o ko na aeto o ka lani; Ma na mauna lakou i hahai mai ai ia makou, Hoohalua lakou ia makou ma ka waonahele.
- <sup>20</sup> O ka hanu o ko makou mau pukaihu, o ka Iehova mea i poniiia, Ua hoopioia oia iloko o ko lakou mau lua, Olelo no makou nona, Ma kona malu makou e ola'i iwaena o ko na aina e.
- <sup>21</sup> E olioli, a e hauoli hoi, e ke kaikamahine o Edoma, Ka mea e noho la ma ka aina o Uza; E hiki aku no ke kiahia iou la, E inu ana no hoi oe, a e hemo no kou lole.
- <sup>22</sup> Ua pau kou hoopaiia, e ke kaikamahine o Ziona; Aole ia e lawe hou aku ia oe iloko o ke pio; E hoopai no oia i kou hewa, e ke kaikamahine o Edoma, E hoike aku no oia i kou mau hewa.

## 5

- <sup>1</sup> E HOOMANAO, e Iehova, i ka mea i hiki mai ai maluna o makou; E noonoo, a e nana mai i ko makou hoowahawahaia.
- <sup>2</sup> Ua huli ko makou aina hooili i na malihini, O ko makou mau hale hoi i na kanaka e.
- <sup>3</sup> He poe keiki makua ole makou, aohe makuakane, Ua-like ko makou poe makuwahine me na wahine kanemake.
- <sup>4</sup> Ua inu makou i ko makou wai no ke kala. Me ke kumukuai i hiki mai ai ko makou wahie.
- <sup>5</sup> Ua hoomaauiia mai makou ma ko makou mau a-i, Ua hooluhia makou, aole hoomaha.

- 6 Ua haawi makou i ka lima i ko Aigupita, a me ko Asuria, I mea e hoomaonaia mai ai i ka berena.
- 7 Ua haua hewa ko makou poe makuakane, a ua ole lakou; Ua kaikai makou i ko lakou hewa.
- 8 Ua noho alii mai na kauwa maluna o makou; Aohe mea hoopakele, mailoko aku o ko lakou lima.
- 9 O ko makou ola ke kumukuai, i loaa mai ai ko makou berena, No ka maka o ka pahikaua o ka waonahele.
- 10 Ua wela ko makou ili me he umu la, Ma ke alo o ka wela o ka wi.
- 11 Moe wale lakou i na wahine ma Ziona, I na kaikamahine hoi o na kulanakauhale o ka Iuda.
- 12 Ua kaulia na'lii iluna ma na lima; Aole i manaoia na maka o na lunakahiko.
- 13 Lawe lakou i na kanaka ui, i poe wili palaoa, Hikaka ae la na kanaka opio, malalo iho o ka laau.
- 14 Ua pau ka noho aua o na lunakahiko mai ka pukapa, A ua oki no hoi ke mele ana o na kanaka ui.
- 15 Ua pau ka olioli ana o ko makou naau, Ua hooliloia ko makou hula i kumakena.
- 16 Ua haule ka papale alii o ko makou mau poo; Auwe hoi makou i ka makou hana hewa ana.
- 17 No keia mea, ua maule ko makou naau; No keia mau mea hoi, ua pouli ko makou mau maka.
- 18 He mehameha maluna o ka mauna o Ziona, Hele no na alopeke maluna olaila.

- 19 Ke noho mau loa nei oe, e Iehova, A o kou  
nohoalii hoi, mai kela hanauna, a keia  
hanauna.
- 20 No ke aha la oe e hoopoina mau loa ai ia makou,  
A haalele ia makou no na la ho nui?
- 21 E hoohuli mai oe ia makou iou la, e Iehova, a  
e hoohuliiia makou, E hana hou i ko makou  
mau la, e like me ka wa kahiko.
- 22 No ka mea, e kipaku loa anei oe ia makou! E  
huhu nui loa mai anei oe ia makou!

**Baibala Hemolele  
The Holy Bible in the Hawaiian language of the United  
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

---

PDF generated using Haiola and XeLaTeX on 18 Apr 2025 from source files  
dated 31 Aug 2023

4fde4536-9f74-574b-8404-d9ec34a30cbb